



30. august 2016

UPA 2016/97

Naqqiut

Siunnersuut 28. juli 2016-imeersoq taarserpaa.
(Tungavilersuutaa naqqiuteqarpoq)

Siunissamut isigaluni pisariaqartitat aallaavigalugit ulluunerani paaqqinnittarfinni atorfinitsitsinernut, ilinniartitaanernut, pikkorissaaqqinnernut ilinniarsimasunillu sulisunik attatiinnarsinnaanermik qulakkeerinninnissaq siunertaralugu UPA 2017-imi periusissanut iliuuserisaassanullu pilersaarummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaannik siunnersuut.

(Peter Olsen, Inatsisartuni ilaasortaq, Inuit Ataqatigiit)

Tungavilersuut:

Perorsaasugut meeqqanut suli atualingitsunut perorsaanikkut inerikkiartuutaasunik ulluunerani neqerooruteqartarfiusuni, ulluinnarmi meeqqerivinnik taasakkatsinni sulisartut akisussaaffimmik annertoorujussuarmik qimatsivigisarpagut. Akisussaaffimmik annertuumik qimatsivigisarnerannik oqariartuuteqarninni makkua ilaatigut tungavilersuutigerusuppakka;

Ullaarnganiit soraarnissatta tungaanut meeqqerisup meerartarput paaqqutarisarpaa, isumasortarlugulu. Immaqaluunniimmi allaat oqarsinnaavugut uagutsinninngaaniilluunniit sivisunerusumik meeqqerisup meerartarput ullup ingerlanerani ilagisarpaa, paaqqutarisarpaa perorsartarlugulu.

Oqartoqartarpoq aamma, meeqqap siunissaa meeqqerivimmiinnerata naalaani ilatigut tungavilerneqartartoq, taamaattumik oqarsinnaasorivunga akisussaaffik annertoorujussuarmik meeqqerisutsinnut tunniussisarsimasugut.

Meerartaavut tassapput pisuussutitta annerpaartaat erlinnarnarnerpaartaallu. Taamaattumik...

Suliassatta pingaarnerpaartaasa ilaat tassaavoq meerartatta pitsaanerpaamik ajunnginnerpaamillu inuuniarnermikkut toqqammavilerneqarnissaat anguniassallutigu.

Taamaattumik isumaqarpunga meerartatta atugaat pillugit, taakkunanngalu aamma sullissisutta atugaat pillugit politikikkut ukkassinerullutalu pingaartitsinerulertariaqartugut.

Meeqqerisugut taakkuupput, meerartatta pitsaasumik siunissaqarnissaannik toqqammavileeqataasussat. Taamaattumik aamma taakku pitsaasumik atugaqartinneqarnissaat pillugu suliniuteqarnissarput pingaaruteqarluinnaqqissaarpoq.

Taakkoqanngippat, uagut eqqissilluta suliartortarnaviannikkaluarpugut. Taamaattumik pingaaruteqarluinnaqqissaarpoq perorsaasutta atorfeqarnermikkut, akissarsiaqartitaanermikkullu akisussaaffimmut tunniunneqarsimasumut naleqquttunik ajunngitsorsiasaqartinneqarnissaat.

Ullumikkut pissutsit imaalersimapput ajoraluartumik sumiiffinni amerlasoorpassuarni ilinniaqarsimasunik perorsaasunik amigaateqartoqalersimavoq, allatullu ajornartunik ilinniarsimangikkaluartunik paarlattaagallartussanik meeqqeriviit sulisoqartariaqartalersimallutik.

Meerartavut taamatut ulluinnarni atugassaqartinneqartariaqanngillat. Meeqqatsinnik paaqputarinnitsigut qimatsivigisartakkagullu taakkuusariaqarput;

1. Meerartatsinnik paaqqinnilluarsinnaasut, perorsaalluarsinnaasut tatigineqarsinnaasullu.
2. Meerartatta pisariaqartitaanik paasinnilluarsinnaasut, ilinniartitsisinnaasut, tunniussaqaqluarsinnaasullu.
3. Meerartatsinnut tunniusimalluartut, meerartatsinnillu ilisarimaneqarlutik tatigineqarlutillu nuannarineqarluartut.
4. Meerartatta inuttut piginnaasatigullu ineriartuutigisinnaasaannik tunniusaqarsinnaasut.

Taamaattumik isumaqarpunga perorsaasutut sulinissaq kajuminnarnerulersinneqassappat, atugassarititaasut pitsanngorsarneqassappata, perorsaanermillu suliaqartartortavut amerlisarneqassappata, taava periarfissat ilaat tassaasoq perorsaasutta akornanni suliffeqarnerup iluani atugassaritaasutigut pitsanngorsaanissaq.

Perorsaasugut amerlisarneqassappata, perorsaasutullu sulineq kajuminnarnerulersinneqassappat, siunissarlu ungasinnerusoq eqqarsaatigalugu perorsaasutta amerlanerpaartaasa sivilisunerpaaamik paariinnarneqarsinnaanissaat anguneqarsinnaassappat, taava periusissioornissaq iliuusissamillu pilersaarusiornissaq pisariaqarsorinarpoq.

Periusissioornitsigut iliuusissatullu pilersaarusiornitsigut ilaatigut makku qulaajarneqarsinnaapput;

“Qanoq iliornitsigut pisariaqartitsineq naapertorlugu atorfinitsiortorsinnaavugut? Ilinniartitsinerit qaffasaanerillu qanoq ittut ingerlassinnaavugut? Meeqquveqarnerup iluani sulisut ilinniarsimasut attatiinnassagutsigit taava qanoq iliuuseqarsinnaavugut?”

Periusissioornitsigut iliuusissamillu pilersaarusiornitsigut perorsaanerup iluani sulisoqarnikkut pitsanngorsaaqataaginnarata aammattaaq ilaqutaariinnut meerartalinnut, meeqqanut, allallunullu paarineqarnissaminnik pisariaqartitsisunut sullissisarnerput pitsaanerujussuanngussaaq. Inerititaqarfiunerusumillu sullissisinnalissaagut. Suliaq sunaluunniit pitsaanerujussuarmik naammassineqarsinnaalissaaq

Taamaattumik ilaatigut taamatut tunngavilersuuteqarlunga siunnersuutiga matumuuna taamatut isikkoqartillugu Inatsisartunut suliassanngortippara.

Qujanaq.

Pisortanut aningaasatigut allaffissornikkullu kingunerisassat.

Periusissanik iliuuserisassanullu pilersaarusiorneq Namminersornerullutik Oqartussanut allaffissornikkut kinguneqartussaassaaq. Suliassap naammassiniarneranut AC-fuldmægtig-imik suliaqartitsineq ukiup affaanik sivilisuseqarnissaa naatsorsuutigineqarpoq, tassalu kr. 250.000,-it missaannut. Naalakkersuisut maannamut suliassaq aallartereersimassappassuk. Imaluunniit sulisuminnut allanut assingusumik suliaqartareersimappata siunnersuutigineqartuo naammassinissaa annikinnerusumik nukissanik pisariaqartitsissaaq.

Namminersorluni inuussutissarsiuteqarnermut aningaasatigut allaffissornikkullu kingunerisassat.

Soqanngilaq

Innuttaasunut aningaasatigut allaffissornikkullu kingunerisassat.

Soqanngilaq